

Innaallagissamut, imermut kiassarermullu akit ilusaat pillugit nassuiaat
(Ineqarnermut, Attaveqarnermut Angallannerermullu Naalackersuisoq)

Saqqummiussissut

Naalackersuisut sinnerlugit matumuuna innaallagissamut, imermut kiassarermullu akit ilusaat pillugit nassuiaat saqqummiuppara. Akit ilusaat maannakkut atorneqartut 2011-imi aningaasanut inatsisissatut siunnersuummi 2011-mi ingerlateqqinneqassasut siunnersuutigineqarpoq.

Nassuiaat pillugu ullumikkut oqallinnerup akit nutaamik ilusilernissaannut sulinita ingerlaqqinnissaanut patajaatsunik tunngavissaqartilissagaatigut Naalackersuisunit neriuutigineqarpoq. Ukiup tulliani upernaakkut ataatsimiinnermi innaallagissamut, imermut kiassarermullu akit ilusissaannut nutaanut, Inatsisartuni akuerineqartussanut aalajangiffigisassatut siunnersuummik saqqummiussisinnanissarput naatsorsuutigaarput.

2005 tikillugu innaallagissamut, imermut kiassarermullu akit assigiipput. Atuisut nioqqutissanik tunisassiornermut atatillugu aningaasartuutiviusunut annertunerusumik akiliisalernissaasa kissaatigineqarnera tunngavigalugu, 2005-imiit ullumikkumut atuuttussamik akit assigiikkunnaarnissaat 2004-mi akuerineqarpoq. Akit assigiikkunnaarsinneqarneranni 2010-mi Nukissiorfiit ingerlatsinermut 75 mio. koruunit missaannik ingerlatsinermut aningaasaliiffigineqarlutik taarsiiffigineqartariaqarsimapput. Ingerlatsinermut aningaasaliissutit amerlassusilerneqarnerat akit ilusissaannut akuerineqartunut toqqaannartumik attuumassuteqarput.

Akinik assigiikkunnaarsitsinerup piviusunnngortinneqarnissaata allartinneqarnissaa suli Naalackersuisut siunnerfiinut ilaavoq. Tapiissutit aningaasaliiffigineqaratik naammassineqarsinnaangimmata tamatigut eqqaamasariaqarparput, taamaattumillu inuussutissarsiutinut innuttaasunullu immikkoortunut toqqartugaasunut tapiissuteqartarnerit eqqarsaatigilluagaasumik naammassineqartarnissaat pingaaruteqarpoq. Tamatuma saniatigut innuttaasut akornanni aalajangersimasunut ataasiakkaanut tapiissutit amerlanertigut atueriaatsinik pitsaanerpaajungitsunik pilersitsiviusarmata eqqaamassallugu pingaaruteqarpoq. Oqaluttuarisaanermi pisimasut pinnagit inuiaqatigiinni pingaarnersiunerit tunngavigalugit tapiissutit atuutsinneqalertassapput.

Aalisakkerivinnut tapiissutit ikiliartortinneqarlutik sullitanut angisuunut akikillisaatinik taarserneqarnissaat inassutigineqarpoq. Sullitanut angisuunut akikillisaatini, najukkani akitigut apparsaaviusuni atuisut kisimik uuttuummut ataatsimut aningaasartuutinut pitsaasumik sunniisarnissaat qulakkeerneqassaaq. Taamaalilluta inuussutissarsiummut ataasiinnarmut tapiissuteqartarneq qimassavarput, kisiannili inuussutissarsiortut tamarmik atuinerminni pisinnaatitaatitsisumik annertussusilimmik atuisuusimagunik akinik appaavigineqarnissamut periarfissinneqassallutik.

Innuttaasut suliffeqarfiillu tamarmik Kalaallit Nunaat ullumikkut siunissamilu aningaasaqarnikkut imminut nammassinnaasoq pilersitseqataaffigisussaavaat. Taamaattumik innuttaasut suliffeqarfiillu tamarmik innaallagissamik, imermik kiassarnermillu tunisassiornermi siaruarterinermilu aningaasartuutitut nammaqataanissamut piareersimasariaqarput. Tamatuma saniatigut aningaasartuutit tunngavigalugit akeqartitsinikkut atueriaatsit, inuiaqatigiit aningaasaqarnerannut annertunerusumik naleqqussarneqartut pilersinneqassapput, tassanilu innaallagissamik, imermik kiassarnermillu atuivallaartarnissaq annertunerpaamik pinngitsoorniarneqartalissaaq.

Inuiaqatigiinni agguaaqqittarneq sapinngisamik ersaritsinneqartariaqarpoq. Taamaaliornikkut inuiaqatigiit isumalluutaat pitsaanerusumik ersarinnerusumillu atorneqalissapput.

Nassuiaat maannakkut Naalackersuisunit Inatsisartunut saqqummiunneqartoq akinik assigiikkunnaarsitsinerup piviusunngortinnissaanut aallartitsineruvoq. Taamaalilluta akit minnerpaaffeqarnerat qaffasinnerpaaffeqarnerallu attatiinnassavarput, taamaattumillu sumiiffinni qaffasinnerpaamik akeqartitsiviusuni akiviusut malillugit akeqartitsinissaq pineqanngilaq.

Neriuppunga Inatsisartut nassuiaammik atuagaqarnerminni pissarsiaqarluassasut, aammalu oqallilluarnissarput qilanaaraara. Taamatut oqaaseqarlunga innaallagissamut, imermut kiassarnermullu akit ilusaat pillugu nassuiaat Inatsisartuni kajumittumik suliasanngorlugu tunniuppara.